

## UVOD:

Menadžment u sportu predstavlja jednu od najvažnijih i ujedno najsloženijih djelatnosti, koji obezbjeđuje da se sportske i poslovne funkcije sprovede na što racionalniji, ekonomičniji i efikasniji način. Bez sportske organizacije menadžment ne može da obezbijedi svoj funkcionalni sadržaj, i obratno, bez menadžmenta sportska organizacija nema integralnu, odnosno optimalnu moć za svoje djelovanje i razvoj. Postignuti rezultati atletičara i atletičarki sa područja tuzlanskog kantona koji su osvajali medalje na velikim međunarodnim takmičenjima navode na razmatranje da je došlo vrijeme da se atletski sport na nivou tuzlanskog kantona mora rješavati sistematski.

Atletika kao grana sporta treba da zadovolji potrebe pojedinaca za kretanjem, vježbanjem, kako bi se ostvario optimalni ljudski potencijal. Kako će se atletika razvijati u tuzlanskom kantonu u značajnoj mjeri zavisi od kvaliteta planiranja razvoja atletskog sporta, kao i načina usaglašavanja razvoja atletike od predškolskog, školskog, studentskog, rekreativnog do takmičarskog odnosno vrhunskog. Strategija razvoja atletike na Tuzlanskom kantonu mora se posmatrati kroz tematske cjeline:

- prostorni kapaciteti
- programski kapaciteti
- kadrovski kapaciteti
- materijalno tehnički kapaciteti
- antropološki kapaciteti populacije

Već duže vrijeme u Tuzlanskom kantonu se vode javne rasprave sa sportskim radnicima kako organizovati atletiku da bi se postizali rezultati kao ranijih godina. Iako je na nivou Kantona usvojen Zakon o sportu prema kome je formiran Savjet za sport na nivou Kantona nažalost sama njegova primjena ostala je bez realizacije. Poznato je da je tradicija atletskog sporta na ovim prostorima vrlo velika i duga, i da je obaveza svih atletskih stručnjaka da se tradicija nastavi i stvore pretpostavke za njegovo poboljšanje. To je moguće samo planskim pristupom u ovoj oblasti. Jedan od bitnih faktora u razvoju atletskog sporta je stručni kadar. Nažalost na području Tuzlanskog kantona egzistira Fakultet za tjelesni odgoj koji proizvodi stručni kadar ali je on dosta malo zastupljen u atletskom sportu. Međutim, mora se istaći da u Atletskom Klubu "Sloboda-Tehnograd" u Tuzli postoji veliki potencijal stručnog kadra sa imenima kao što su Vinko Galušić, Zlatan Saračević, Kada Delić, Muhamed Delić, Jasna Fočak, Salih Hot, Nermina Mujić, Halid Gazibegović koji bi trebao biti odlučujući faktor za strategiju razvoja atletskog sporta u narednom periodu. Veliki značaj mora se posvetiti Dijagnostičkom centru i Zavodu za sportsku medicinu. Jedini način rješavanja stanja u sportu je stvaranje stručnih kadrova menadžera koji će preuzeti ulogu primjene sportske i poslovne funkcije, te postati osnovna pokretačka snaga ekonomskog, društvenog i kulturnog razvoja u savremenom svijetu sporta.